

TE HIRORURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matahiti hoê.

Nu. 4.

Eperela 1930.

Mat. 24.

*E teie nei, e tau mau taeae here e, a haere mai na i te
Fatu ra, i Tei Mo'a. E haamana'o outou e, ua titiaifaro to
'na haerea. Inaha, ua pirihaio te e'a no te taata nei, area
tei mua tia ia'na, e ua titiaifaro hoi, e te tia i uputa ra, o
Tei Mo'a ia i Iseraela nei; e aore hoi oia i tarahu i te tavini
i reira ra, e aore hoi e e'a ê, maori râ, na taua uputa ra; e
ore oia e vare, no te mea, o te Fatu ra o te Atua To'na ioa.
(II Nephi 9:41)*

Te Faaroo no te Feia Mo'a Mau.

Ua iritihia teie nei parau na roto mai i te buka: "Te Hiro'a Faaroo i
papaihia e Tamate Aposetolo; Faaauhia ei reo Tahiti e Elita.

HIRO'A FAAROO 11. *Te haamori nei matou i te
Atua Mana-hope mai tei au i te aau nei, e e faatia'tu hoi ia
na reira atoa te taata atoa ia haamori, noa'tu te huru, e te
vahi, e te mea ta ratou i hinaaro ra.*

Uiraa 12. *E mea nahea te faatereraa i roto i taua na basi
leia nei?*

P. *Mai te au i te parau papai, tei roto i te basileia Hai-
hai te mau parahiraa e rave rahi e ua na reira atoa ia i roto
i te basileia Teitei, no reira e feruri tatou e, te reira ia te hu-*

ru i te basileia Teretetiera. E faaterehia te basileia Teitei e te Atua e te Tamaiti. E e faaterehia te piti o te basileia e te Tamaiti. E e faaterehia te basileia haihai e te mau melahi no te basileia Teretetiera o tei maitihia no te reira ohipa.

Ua tia ia tatou ia feruri e, ua nehenehe i te taata ia haere i mua i roto i taua na basileia ra, e no reira ua riro te reira ei ravea na te taata ia haere i mua e a muri noa'tu.

Uiraa 13 O vai te *Mau Tamaiti o te pohe*, e eha to ratou utua?

P. O ratou ia tei pee noa'tu ia Satani i roto i ta'na mau opuaraa'toa. O ratou ia te mau taata o tei faahapa i te parau mau noa'tu to ratou ite-papu-raa i te parau-tia; o ratou atoa tei farii i te parau faaite a te Mesia e te Varua Maitai atoa e i reira faahapa noa'tu i te reira. A hió i te Hebera 6: 4-6 te hara teie e matara-ore-hia e a muri noa'tu.

Te na ô maira te heheuraa no to ratou utuá: "O ratou teie o te mau tamarii no te pohe, o ta'u i parau e, e huru maitai aé ratou ahiri eiaha ia fanau mai; e mau auá hoi ratou no te riri, o tei faahapahia ia vai te riri no te Atua i nia ia ratou, e te Diabolo e to'na ra mau melahi e a muri uoa'tu,*
***E rave anaé ratou i te faautuaraa mure ore, oia hoi, te faautuaraa hopea ore, e o te faautuaraa ia e vai e a muri noa'tu te faaea ratou e te Diabolo e to'na ra mau melahi a muri noa'tu, i te vahi e ore e pohe ai te hoé, e e ore hoi te auahi tinaihia, e to ratou hoi ia mamaeraa, aore roa e taata eite i te reira hopea, aore rá te reira vahi, aore râ to ratou mauui; aore hoi i faaitehia, aore hoi i teie nei, e aore hoi e faaitehia i te taata, maori râ o tei faarirohia ei farii i te reira; atira'tu â ia, e rave rahi râ ta'u ta te Fatu i faaite na roto i te orama; e ua opani-faahou-hia i reira râ; no reira te hopea te aano, te teitei, te hohonu, e te mamaeraa no te reira

aore ia i iteahia maori râ i te feia o tei faataahia i te reira ra faahaparaa." (Buka fafau 76:31-48)

Parau Tauturu: No reira, mai te au i te mau parau no te ao ra, ua tia roa i te taata ia vai tiamâ ia rave oia i te maitai e aore râ i te ino, no te mea e faautuahia oia no te reira; e mai te mea ua tapeahia oia e haapao i te hinaaro no vetahi e aita roa ia e tia ia na reira to'na faautuaraahia.

Te paturaa ia Ierusalema Api

TE TAU HAAMANI-INO-RAA

Outoa atoa tei mâtai i te tuatapaparaa no te Ekalesia, ua ite ia i muri ae i te haaputuputuraa o te mau melo rii i Missouri, ua tupu te hamani-ino-raa i te rahiraa, e tae noa' tu e, aita e nehenehe ia ratou ia faaea faahou i reira. I roto i taua tau hamani ino rahi ra ua haere te Feia Moá i Fa Wesa (Far West) i Missouri, e ua tuu ratou i te ofai poro i reira, mai te manaó ra e, e patu ratou i te hoê hiero i reira, no te mau hamani ino-raa râ, aita atura i oti.

E i te hopea ua tiavaruhia te mau taata i rapae i te reira tufaa fenua, e rave rahi tei taparahihia, e ua rahi atoa tei tapeahia i roto i te mau fare tapearaa, e ta ratou mau tiaraa maitai e te moni rahi, ua haamouhia hoi ia te reira.

Ia tiavaruhia ratou i rapae ia Missouri, ua haere ratou i te tufaa fenua ra Ilinoi e faaea rii ai. E iva matahiti i muri ae i te tau i horoahia i te heheuraa ta tatou i taió ra, ua faaue te Fatu i te Ekalesia ia patu i te hoê hiero i Navu i Ilinoi. Aita teie hiero i oti a tupu faahou te mau tairiraa i nia iho i te Ekalesia. Atae ra hoi te hamani ino i itehia mai te reira roa te rahi, Ua hurihia te mau taata i roto i te fare tapearaa, e ua parihia i te orure hau, te taparahi taata e te tahi noa' tu mau pariraa i te imiraa i te peapea no te Feia Moá. Aita roa' tu hoê hara i itehia ia au ia ratou ia faautua mai mai

te au i te ture. Na roto i to ratou maha ore i te hamani ino, ua tiavaru faahou-hia te Feia Mo'a i rapae i to ratou fenua, e i raro a'e i te aratairaa o te Peropheta a te Atua, o Brigham Young, ua fariu atu to ratou mata i te tooa o te râ, mai te mana'o ra e, e tae atu ratou i te ho'e vahi maitai, i te vahi e ore ai te haamani-ino-raa, e ia au ia ratou ia haamori i te Atua mai te au i tei aratairaa o te Varua, i o na i nia i te mau Moua Ofai. Na roto i te peresideniraa o Brigham young, o tei riro ei peresideni, ua arataihia te Feia Moa na roto i te medebara i te mau Moua Ofai.

Mai te au i te faaueraa i te Ekalesia ia faariro ratou i te tufaa fenua no Jackson i Missouri ei vahi putuputuraa no te Feia Mo'a, e ia patu ratou i te hiero i reira i teie nei a ui "E faaea hoi te ho'e ata i nia iho i te reira." Mai te reira atoa ta'na faaiteraa i roto i teie tuaro'i parau e ore te reira vahi e titauhia ia ratou. E ua na o faahou maira; "Teie ta'u e faariro nei ei hoho'a no outou, no te haamauruura ia ratou o tei faauehia ia rave i te ho'e ohipa, e tei faataupupuhia e te rima o to ratou ra mau enem'i, te na reira maira te Fatu to tatou Atua." B.F. 124:53, B.F.S. 107:16

I muri a'e i te taeraa o te Feia Moa i te mau Moua Ofai, te ho'e ia ohipa matamua ta te peresideni i rave, te faataaraa ia i te ho'e vahi ei tiaraa no te ho'e hiero, i nia iho i te vahi ta tatou e parahi nei i teie mahana, i reira iho ratou i haamata'i i te faatia, e ua tamau noa ratou e tae noa 'tu i te otiraa, e te haamaitairaahia, e mai te reira mahana mai a ua rave-noa-hia ia te ohipa a te Atua i roto ra.

TE MAU HAAPAORAA HURU RAU

I te taime i faarue ai te Ekalesia i Navu, i Illinoi, e rave rahi te mau melo tei parahi atu, tei rotopu ia ratou te utuafare o te Peropheta. Sidine Ritidona, te taata tei haamaitai i te vahi i Missouri, te vahi e faatiahia'i te oire ra o Ziona

e te hiero, e hoa fatata hoi oia ia Iosepha Semita, e i te hoé taime e tauturu oia i roto i te Peresideniraa. Ua haere atura oia i Pittsburgh, haaputuputu ihora oia i te hoé mau taata rii i pihai iho ia'na, e ua faatia oia i te tahi Ekalesia mai te hohoá ta'na i ite i Navu. Aita ra i manuia ta'na ohipa e aita i maoro ua purara atura ta'na mau taata.

Iakobo J. Strang, te tahi ia taata mana rahi i roto i te Ekalesia, tei parau maira e, ua maiti Iosepha Semita ia'na ei mono na'na i te Peresideniraa. E rave rahi atoa te mau taata ta'na i aratai atu i Motu Bevera, (Beaver Island) i te roto Michigana, faatia'tu ai i ta'na Ekalesia i reira e ua tonono oia i ta'na mau Orometua i Baratane e i te tahi mau vahi o te ao nei. E i muri iho ua faatoroá to'na mau taata ia'na ei arii no ratou, e ua parahi arii noa ra oia e tae noa'tu, na roto i ta'na faatereraa etaeta ua taparahihia oia e te hoé o ta'na mau taata.

Te tahi ra o Saimana Uaiti, e taata mana atoa oia i roto i te Ekalesia, haaputuputu ihora oia i te tahi pupu iti o teie mau taata tei mairi i muri i te tere i te mau Mouá Ofai. Ua reva'tu ratou i Texasa, e no te hoê tau poto ua tapea oia ia ratou i pihai iho ia'na. Mai te tahi atoa ra mau taata ra, aita ra i maoro, faaruehia ihora, oia anaé i to'na vahi.

Na roto mai hoi i teie mau amuiraa rii ra, e i raro ae i te aratairaa o Iosepha Semita, te Tamaiti a te peropheta, ua faatiahia te Ekalesia a Iesu Mesia i te Feia Mo'a Faaapihia no te mau Mahana Hopea nei. Te vai rii noa ra hoi taua amuiraa ra i teie nei â mahana.

HEDRICKITS, E AORE RA, EKALESLA A TE MESIA

Te vahi rahi ra ta'u i hinaaro ia feruri maitaihia, tei nia ia i te amuiraa nainai o tei parauhia, te Hedrickits. I te matahiti 1851 ua haamata o Granville Hedrick e o Daniela Judy, o tei faatoroáhia i mua atu ei tau peretiputero i roto i te Ekalesia, i te aó haere i te Evanelia mai te au i ta raua ite.

Ua haaputupu i pihai iho ia raua te mau melo rii ta raua i faafariu ra, e ua faaore ratou i te haapiiraa no te faaipoipiraa, e te haapiiraa no te baptizoraa o te feia ora no tei pohe, e te pae rahi o te mau heheuraa tei horoahia i te Ekalesia na roto ia Iosepha Semita i muri i te matahiti 1834, i te na ôraa mai e, i muri i te reira matahiti e peropheta topa ia oia. Ua haere taua mau taata ra i te matahiti 1864 i te tufaa fenua ra o Jackson i Missouri, e i muri rii iho, na roto i te hoo, ua noaa mai ai ia ratou te hoé tufaa o te fenua tei itehia e tei parauhia te vahi tiaraa hiero. Te tufaa fenua tei hoohia e Edward Partridge e 63 ia acera i roto, e ua parauhia hoi te reira te vahi tiaraa hiero. Ua tatufaahia teie nei fenua e ua roaa e 3 acera noa iho o taua fenua rahi ra i te Hedrickits, e tei ia ratou te reira i teie nei.

Na roto i te amuiraa mai o te tahi mau taata e rave rahi o te Ekalesia i Faaapihia ra, e te mau taata êê ta ratou i faafariu mai. Ua tupu roa te meloraa i te rahiraa i teie mau mahana nei. E ua faatia ia ratou iho i roto i te Ekalesia o te parauhia e ratou, te Ekalesia a te Mesia.

TITTAURAA TAUTURU

Ua papu ia outou e, ua tono teie mau taata i to ratou mau taata tanturu, o tei farerei haere i te mau amaa i roto i te mau titi i Ziona i Utaha, e i Arizona, e i California, e i Aidaho, e i te tahi atu a mau vahi. E te parau ta ratou e afai haere nei o teie ia; ua heheu mai te Fatu ia ratou e, ua tae te taime no te faatiaraa i te hiero i nia i vahi tiaraa hiero i te tufaa fenua ra i Jackson i Missouri, ia faatupuhia te parau ta'u i taio i roto i te B.F. 84, B.F.S. 83.

E te na ô mai nei ratou e, te uí tei ora i te tau i horoahia mai ai teie heheuraa, ua fatata ia i te mou. Ua tae mai atoa ia tatou nei. Ua tae mai i to tatou mau piha toroa

mai te titau i te tauturu. Te hinaaro nei ratou ia tauturu tatou ia ratou i te paturaa i te hiero, oia hoi, te hinaaro nei ratou ia tatou i te amui i rotopu ia ratou, eiaha ra, na tatou e faatere, ia farii ra i to ratou mau hinaaro.

E FARE, EIAHA RA, E HIERO

Te mau taeae e te mau tuahine, i te rahi o to tatou araha ia ratou mai te matamua mai â, e tei faaite tamauhia atu ia ratou, aita roa'tu e nehenehe ia tatou ia farii i te vahi ta ratou i ani mai. Parau mau, e nehenehe noa ia faatia i te hoê fare i nia iho i te reira feuua i tei e nei ui, e ore roa ra te reira e riro ei hiero patuhia i te íoa o te Fatu, e aita atoa oia e farii i te reira, e tae noa'tu i te tau ona e parau mai ai na roto i tei maitihia e ana, e ia ravehia te reira ohipa e te Ekalesia itehia e ana e tiaí.

TE TUMU NO TE HIERO

Ua ui atu vau i teie mau taata e, e aha ra ratou i te hiero ahiri e hiero to ratou. Eaha mau te auraa o te hiero i te feia tei ore e farii i te bapetizoraa o te feia i ora no tei pohe? Te tumu rahi matamua, i te taima te Fatu i faaue mai ai ia patuhia te hiero i Navu, ia roaa ia ratou i te tahi vahi no te raveraa i te mau oroa no te feia i pohe; e ua faaite papu mai te Fatu ia ore te mau taata e rave, e e faaoti i te reira ohipa, ia au ia tuuhia te mau taviri e te mana, no te raveraa i teie mau oroa, eita oia e farii faahou i te raveraa i te mau oroa no tei pohe mai tei ravehia i mua'tu. Te hinaaro nei au i te tuati mai i te tahi vahi tei tano i nia iho i te vahi i parauhia.

Faauihia ei reo Tahiti e Roroma

(E Tuatibia teie nei parau.)

Nafea Tatou e Tae i te Atua?

Ua ite tatou atoa i to tatou mau hinaaro, oia hoi, ia tae tatou atoa i te Atua ra e ia amuihia tatou atoa nei i raro ae i to'na ra'aroa rahi, o ta'na ia e horoa mai i te feia atoa te faaroo Ia'na ra.

Te ite nei tatou i te mau haapiiraa huru rau a te taata nei, o tei haapii mai ia tatou i te mau ravea ia tae atu ai tatou i te Atua ra. Area râ, te vai nei te hoé parau iti ta Iesu i haapii mai ia tatou, e na te reira parau e haapapu mai ia tatou i te ravea e tae atu ai tatou i te Atua ra. Ua na ô maira Iesu e, “Ua hinaaro outou ia'u ra, e haapao i ta'u parau” (Ioane 14:15)

E feruri tatou, mai te mea e, te hinaaro nei tatou i te hoê mau mea e haamaitairaa i to tatou parahiraa i roto i te ao nei, e aha ihora tatou? Teie ia, e imi tatou i te mau mea, e te mau ravea ei tautururaa ia tatou i te noaaraa i to tatou mau hinaaro mau.

Mai te reira atoa te vahi ta tatou e ite nei i roto i teie nei irava ta Iesu i tuu maira, a na ô mai ai oia e. “Ua hinaaro outou ia'u ra, e haapao i ta'u parau.” E no reira mai te mea te hinaaro nei tatou ia Iesu, ia haapao tatou i ta'na ra mau parau atoa e tia'i.

Te haapii mai nei Paulo i te hoé irava maitai roa ia tatou i te na ôraa e, “Eita e tia ia outou ia inu i te a'ua a te Fatu ra, e te a'ua a te mau demoni: eita e tia ia outou ia amui i te amuraa a te Fatu ra, e te amuraa a te mau demoni” (1Korinetia 10:21)

E teie nei, te ite nei tatou e, mai te mea, ia inu tatou i to te a'ua a te Fatu ra, e aore râ, ia amu tatou i Ta'na amuraa ra, ia haapae tatou i te ohipa a te mau demoni e tia'i, e ia rave noa tatou i te hinaaro o to tatou Fatu, no te mea te vai

noa mai nei To'na aroha rahi i nia iho ia tatou i te mau mahana atoa ra.

Na'na e faaora ia tatou, mai te mea, e haapao noa tatou i Ta'na parau e tae no'tu i te hopea. E no reira e homa e, a faaroo maitai tatou atoa i Ta'na mau parau i tuuhia mai, e a faaineine tatou i to tatou mau aau ei farii i te mau parau Ta'na e tuu mai i te mau mahana e toe i mua i tatou nei.

—*Papaihia e Coleman*

Te Bapetizoraa no tei Pohe

Mai te tau nō Iesu iho e tae roa mai i te mau mahana no tatou nei aore roa'tu te bapetizoraa i hapaohia no tei pohe. Aita hoé Ekalesia i nia i te fenua nei tei farii i teie mau ohipa i taua mau mahana ra. Te manaó râ ratou e, ia pohe te hoé taata mai te bapetizo-ore-hia, ua roaa ia te pohe ia'na. Te vai nei râ te tahi pae o te mau faaroo tei haapao i te hoé ohipa maitai ei tauturu i to ratou mau hoa ra tei pohe, oia hoi e, ia pohe ratou, ua purehia te hoé mau pure mai te ani i te Fatu ia aroha mai e ia tauturu mai ia ratou. Ua haapaohia râ teie ohipa no te mau taata no te Ekalesia anae, eiaha ra e, e tamata atoa e tauturu ia ratou tei pohe i rapae i te Ekalesia. Ia hió papu noa'tu tatou i te rahiraa o te taata tei ora i nia i te ao nei mai te matamua mai â, e ia hió atoa tatou i teie vahi, i reira tatou e ite ai e tufaa nainai roa tei faaroo i te mau parau no te evanelia e te pae rahi roa ia tei ora noa mai te aó-ore-hia i te mau parau moá ra no te Fatu. Inaha hoi, e mea tia roa ia imi tatou i te hoé ravea ia ora ratou. Te haamori nei anei tatou i te hoé Atua aroha ore, e aore ra eaha ra ia to'na huru? E tuu mai anei oia i teie mau Varua i roto i to ratou mau tino i te fenua nei, e e ora noa ratou e pohe atu mai te faaroo ore i te parau Evanelia, e no ta ratou faaroo-ore-raa i te parau mo'a e Katara oia ia ra-

tou i te pohe mure ore? Eiaha tatou e na reira i te feruri, a na o ra; e imi tatou i roto i te mau parau papai e te mau parau heheu ia itehia Ta'na opuaraa paari, no te mea e Atua aroha iho â ta tatou atoa e haamori nei. Aita Oia e ore i te horoa i te ravea e ora ai te mau tamarii atoa, tei faaroo e tei ore i faaroo i ta'na Evanelia. Ua haere Iesu iho e a'o i te parau i te mau Varua i roto i te tapearaa, e taua mau varua ra o ratou ia tei ore i faaroo. (A hió i roto i te I Petero pene 3 irava 19-20)

Ei teie nei e tamata tatou i te tuati i ta tatou upoo parau i te manaó e tere nei, oia hoi e. I te tau no Iesu iho te vai ra taua haapiiraa i rotopu ia ratou ra. Na vai i faaite mai ia ratou? Na te irava i neneihia i te pae o mua o teie parau potu. Na taua parau nei i haapapu mai ia tatou e, te vai ra to ratou papu-ore-raa i nia i te parau no te baptizoraa no tei pohe. Ia tae ra i te mahana e tia faahou mai ai Iesu no te pohe mai, ei reira ratou e ite ai i te faufaa no taua oroa ra. Te ui mai nei teie irava nei ia tatou, eaha ihora te feia i baptizohia no te feia i pohe ra, ia ore roa te feia i pohe ra ia tia faahou? I teie nei ra ua papu ia tatou atoa ua tia mai Iesu e te tahi feia mo'a mai te pohe mai, e ia papu ai te parau no te tia-faahou-raa ua papu atoa te faufaa no te baptizoraa no tei pohe.

Te vai nei te hoé Ekalesia te haapao nei i te haapiiraa no te baptizoraa o tei pohe, e taua Ekalesia nei o te Ekalesia a Iesu Mesia i te Feia Mo'a i te mau mahana Hopea Nei ia. I te mau mahana atoa ra te raverave-noa-hia taua oroa ra i roto i te mau Hiero mo'a o te Fatu.

Te haapao noa nei to teie nei Ekalesia i to ratou mau hoa tei pohe aénei na roto i te faatiaraa i te hoé baptizoraa no ratou atoa ra. Te ravehia nei taua ohipa raia maitai ratou

tei pohe aênei e ia tupu te oaoa o te mau taata atoa tei haere ei mono no ratou. Ia hio maite tatou, o teie ia te opuaraa paari ta te Atua i vaiho mai na tatou ei ravea ia ora te mau taata atoa, noa'tu te tau no to ratou oraraa i nia i te fenua nei.

—*Papaihia e Mati*

Te Mau Parau Api

E NUU MA'O RAHI

Ua tere atura te hoé mau taata na nia i te Yacht o Mizpah, e ua haere ratou e mataitai i te mau motu i parauhia Galapagos, e i to ratou hoíraa mai, na taua fenua ra, ua farerei ratou i te hoé nuu ma'o e no te rahiraa o te ma'o i taua vahi ra, ua pupuhi noa te mau taata i te ma'ó na nia 'tu i te pahi ia ore to ratou pahi ia ino i te ma'o. Te faaite mai nei te Raatira no taua Yacht ra e, e rave rahi te hanere i te ma'o i pupuhibia e ratou i taua taime ra.

TE PERESIDENI NO HAO

Ua tae mai te Peresideni no te amaa Hao i te 17 no Mati, e te faaite mai nei oia i te huru no te amaa i Hao, e mea maitai roa ia, e te tere nei te ohipa maitai i mua. Te faaite atoa mai nei oia e, te oaoa nei te mau taata no Hao i te mea e, te fatata mai nei te amuiraa Eperela, e te hinaaro nei ratou i te haere i Hikueru no te reira. Te haere nei te poti Otepa i reira i te afai mai ai ia ratou, ia faatupuhia to ratou mau hinaaro. E tia ia oaoa te taata atoa o tei manaó e, e tae ratou i Hikueru no te amuiraa, no te mea e, o te hanere teie o te matahiti mai te faatiaraa o te Ekalesia e tae roa mai i teie nei.

TE TERERAA O TE PERESIDENTI MA

I te 4 no Febuare aénei, ua reva'tura to tatou Peresideni Gihoti Borobiti e Ta'na vahine e ta raua mau tamarii. Ua reva atura ratou i Takaroa, parahi ihora. I te 14 no Mati ua hoí maira te Peresideni na Takaroa mai e te faaite mai nei oia e, te maitai nei to Takaroa, e te tere noa nei te ohipa maitai i mua. Ua tae mai oia e o Viliamu na nia i te poti Otepa, e ua parahi atura Matirita e te mau tamarii i Takaroa ra, mai te manaó e, e tere atoa mai ratou i te mau mahana i mua nei.

TE HOE TUATAPAPARAA TAHITO NO ROTO
I TE HOE ANA

I roto i te mau mahana ae'nei ua itehia, i roto i te hoé ana i te fenua ra Nevada, te parau tuatapaparaa no te hoé feia tahito tei parahi i taua fenua ra. Ua manaóhia e te feia paari o te ao nei e, e 3000 matahiti te maoro i te vai-raa o te reira parau tuatapaparaa i roto i taua ana ra. I teie nei râ, ua afaihia'tu te reira mau parau'i te hoé haapii-raa teitei i te fenua ra California, e te tamata nei te mautata no taua haapii-raa ihora, i te iriti mai i te auraa o te mau parau papaihia i roto ra.

PARAU FAAITE

Te mau Taeae e te mau Tuahine e tae noa'tu i te mau hoa, te faaite atu nei matou, e faatere matou, te Amaa i Papeete nei, i te hoé haapii-raa hohoá i te 6 no Eperela i te hora 6:30 i te ahiahi. E te ani atu nei matou ia outou ia haere anaé mai outou paatoa i taua faatereraa hohoá a tatou.

M. Bonnet M. Gerant et Imprimeur,

Rue Brea et de la rue Dumont d'Urville, Orovini, Papeete